

四庫全書

集部

欽定四庫全書

止齋集卷五

宋 陳傅良 撰

律詩

新昌詠歸

回頭三十二年非  
木落霜空水見涯  
萬事自憐多譽早  
半生猶幸一官遲  
好將翰墨付儕輩  
去與漁樵相爾誰  
還有故人招隱否  
寄聲橘柚欲黃時

贈石時亨 并序

釋氏敵生死老氏無怛化而吾儒則曰夭壽不貳修身以俟之所以立命夫垂涎麴車染指羊鼎豈曰不知味要不若饑食渴飲之為至也吾友石時亨喜二氏書晚與余游讀易論語於其行作詩贈之

要是同根本應須識等差六經無剩語百氏自名家日落山含斗潮回浦見沙了知來往意萬古一生涯

題觀潮閣

俯拾滄溟大衡陳蒼

去聲

莽多閩山飛鳥沒吳會一帆過

消長看沙尾行藏問釣蓑登臨有如此人物付誰何

上閩帥梁丞相生日二十二韻

炎正維中葉皇圖再造年天潢流少海星緯繫台躔臣  
主嘗難並乾坤豈偶然千齡開歷數一氣付陶甄黃屋  
傳神器彤庭領衆仙風雲從此會日月更誰先昔者求  
侵地何人賦甫田吳兒咸抵掌魯等欲差肩廟論惟多  
士戎功不在邊一麾分赤社萬事屬青編吾道誠難用  
諸儒亦自偏才名多蕩落經行失拘攣洛蜀何嗟及熙

豐竟禍延旁羅魚鴈木平步忽貂蟬甚矣知當寧淒其  
望濟川年來羣老行公在萬民懸定作鹽梅夢行歌杖  
杜還滄溟宗衆濫衡嶽倚蒼玄要使垂身後無為慰眼  
前管絃無筭爵桃李未央天魯燕雖堪頌閩山不足鵠  
中原康濟事彛鼎願聯翩

送鄭少卿景望知建寧

過家鄉里敬將母士夫榮得失從人論行藏獨自明百  
年中古少一笑萬金輕庶讓吾何敢新茶可擷英

有志須身健關心在歲寒一時諸老盡多見大名難湖  
海方連旱甌閩遼少寬為州人不乏千萬強加餐

清廟圖書寶熙朝雅頌音頻繁三節名荏苒二毛侵衣  
飯家纔足丘園意亦深卧聽床下士時作武侯吟

海內言華萼誰名動搢紳豈無當世志能忍十年貧酒  
興新來減交情老更親公餘如促膝剩把古書陳

兼送景元

屏廢誠愚分牢愁更索居若逢知己問猶解課兒書地  
僻門長閉年饑菜自鉏相望無一字不是故情踈

庚子除夜有懷

老盆自酌共誰歌嘆息其如此夜何已覺二毛嗔婦問  
可堪一飢患兒多闕河滿眼風塵在天地歲身歲月過  
事業文章吾所畏東陽人亦卧巖阿

送沈元誠赴臨漳主簿

誰說鄉先進能無沈隱侯青衫今遠越白髮竟依劉

時里

人劉義夫  
守臨漳

道固為名累人當與命謀三台行漸近且勿

問歸舟

終藏懷未已欲去事多違士友方推轂鄉鄰但挽衣冥  
鴻寒汲汲霜菊晚暉暉何限春蜚動君看果是非

送德遠弟赴省

科名雖細事文字要新功方拙存家學豐腴與衆同江  
湖多我友臺省半諸公為道貧非病連簷有芥菰

和張孟阜歲旦韻

白髮朝看鏡青燈夜數更文章輸善宦名字誤浮生廢  
學兒鼾睡安貧婦饁耕從今定逢吉吾已卜先庚



聞沈元誠歸自臨漳喜而奉寄

荔圃斑斑熟蠔房箇箇肥我雖緣此誤公亦為何歸吏  
事生衣垢家山減帶圍不無華袞字卿月更光輝

晚春二首

萬枝寂寞待春風風雨過多春已空未曉啼鶯相喚語  
海棠飛盡一庭紅

莫道春歸事已非水邊天際綠成圍隔籬聽得農家語  
雨過田田麥舍肥

送孫審卿赴壽昌主簿

烏鵲填門雪滿除  
倩誰騎馬謝雙魚  
苦吟孫楚三年別  
饑卧袁安一病餘  
仕宦吾人聊復爾  
夢魂今夜定何如  
釣臺多是西征客  
莫道渠能賦子虛

哭呂大著至明招寺簡潘叔度

小雨崇朝過深秋  
薄海清故人期不至  
喬木眼偏明欲  
往還何日堪論久  
此情侯芭幸無恙  
應就太玄名

招徐居厚

老來却憶少相過，別自何年白髮多。  
山葉抱蟬蟲吊夜，去看滄海壯秋波。

天台王子木解官長樂見訪

夜深擘荔真愁絕，春淺傳柑更惘然。  
世事愛來欺兩鬢，人生堪得別多年。  
琢冰積雪江湖阻，樹羽崇牙日月懸。  
此理倉茫君勿問，明朝且莫刺歸船。

月夜書懷二首

送客門初掩，收書室更虛。  
新簾高過瓦，涼月下臨除。  
婦

病纔扶杖兒饒或饋魚今朝吾已過莫問夜何如  
道德吾何敢功名代有人倉黃恒畏咎斑白慙憂貧細  
字書全廢深杯酒勿親靜言空自愛萬古亦泯泯

送周魯山辰州法曹

團圞妻子是誰家獨被饑驅天一涯遠地豈無人晤語  
長才能免世驚嗟好於書作千年計勿為官驅兩鬢華  
為問湖南似湖北逾年吾亦訪丹砂

游丁次翁篋簾園期次翁不至

徑蹊曲折屋參差半是天成半自治修竹萬竿人獨立  
我來搔首菊花期

送朱同之福州戶掾

我自三山失馬餘君方千里問津初衣冠萬室催科易  
禮樂元戎節目疎謹勿向人徵外事只須著意訪奇書  
一年正好榕陰密丹荔黃蕉奉版輿

覓樹栽

覓得循除數畝園衰遲無力正乾坤學為老圃徒幽意

富比封君亦浪言計日若將栽樹木成陰當待長兒孫  
出門悵望春連塢為向雲屯斲一根

題仙巖梅雨潭

袞袞羣山俱入海堂堂背水若重闌怒號懸瀑從天下  
傑立蒼崖夾道陳晉宋至今堪屈指東南如此豈無人  
結廬作對吾何敢聊向樵漁寄此身

次陳益之韻戲呈汪守充之

雨過山新沐風平水漫流移尊來選勝立馬步通幽春

在桑麻塢香團橘柚州從君詩有律還我酒無籌

汪守坐上

苦吟而忘飲客  
酒因戲及之

汪守三以詩來次韻酬之

一年春事墮槐宮却愛清和與政通乳燕黃鸝相倡和

落花脩竹亂青紅羨君有賦非占服

使君以四月一日為題

愧我

無才可送窮細與論文一樽酒它時還憶暮江東

江城如在水晶宮百粵三吳一葦通桑女不論裘粹白

橘奴堪當粟陳紅絃歌滿市衣冠盛鉅訟無人刀筆窮

多荷弱翁今少霽更能携客謝巖東

音合桑林律中宮試聽布鼓亦三通相從壁水浮葱白

見酒正注一別閩山擘荔紅把釣扁舟將老去款門多竹未

全窮若為皂蓋能忘我立盡斜陽車不東

汪守屢期見訪不至

酬謝侔景英用前韻見寄

窮巷蕭然一畝宮勞勞漫刺倩誰通空翻故紙頭垂白

晚對清標面發紅諸老飄零亡幾在

謝乃參政任伯之姪

百年放

佚不勝窮擬將舊學相從問何獨詩壇欲讓東



用幽字韻戲簡謝倅

當戶排危翠循除漾淺流此生從稼圃誰與伴深幽韓  
子癡凭桺龐公倦入州青葛與白飯却待為君籌

用幽字韻呈汪守謝倅

旌騎收人迹簪紳雜道流引盃忘日永得句與山幽行  
在今當路中興此望州為將登覽目著處訪邊籌

用幽字韻荅賈端老

人皆忘姓字誰獨訪源流病驥宜懷轡遷鶯故入幽十

年慚主簿萬戶薄荊州此事吾何敢相將負一籌

自仙巖還舍留別諸友

瀑布衡從雲一塢浮圖明滅木千章在山終愛離山去  
遮莫黃塵浣我裳

送任虞卿教授江陰

學省穿楊末江城振羽端聲名人不忌仕宦意常寬缺  
月天將曙孤村歲已寒小舟來話別此道少人敦

和謝倅見贈生日二首

朝天冠佩幾千負熟數東州未乏賢若論中原舊文物  
蒲輪應合聘高年

獨醒長愛衆歡酣酸苦隨人却嗜甘好客不知彈劍缺

聞公風味可無慚

謝倅絕不飲而善勸客  
酒惟客所好獨嗜甘物

再和

休將杓鑿問方貧且引壺觴對聖賢鴻鴈不賓滄海凍  
梅花相伴笑年年

淺杯莫到十分酣但愛齁齁夜夢甘萬里桑麻風雨好

一夫尸祿我何慚

謝倅生日

此夕其如好客何  
秋風嫋嫋水微波  
渡江公子今無恙  
上蔡家聲世不多  
未放清朝空老去  
欲談前事竟誰過  
阻陪觴豆彷徨久  
坐想風流為一歌

景元益之諸友考試旁郡余夢與步月聯詩得  
水花初淨月如銀之句追成一絕

連年波浪與埃塵誰可論心五六人  
昨夜夢同天地濶

金匱石室  
卷五  
水花初淨月如銀

謝倅監試未畢事而出以詩三章來用韻奉酬  
殷勤送客蹇誰留久待江城未解舟我醉欲眠君且去  
不妨懶瓚繼前猷

歸舟莫訝太匆忙會面何曾累十觴孰與持螯霜月下

拍浮酒浪舊陂塘

公不能飲

極欲從君十日歡倦飛終羨鳥知還棘圍觀戰緣何事  
亦縱驂騑自出關

沈仲一三益堂

有此名三益之人可晤言  
游藏無俗物典則似諸昆  
刺著書充棟仍添竹過垣  
翻愁長者轍稀得到柴門

遊金輿趙園

脉脉循簷水林林夾岸山  
令兒從竹下領客入雲間  
稠木容人過懸崖著手攀  
從今名字出不到徑苔斑

海棠絕句

淡月看花似霧中  
遽呼燈燭倚花叢  
夜來月色明如晝

却向庭蕪數落紅

湖樓送客即事一首奉懷益之魚簡同餞諸友

誰家喧馬盍朋簪屋壓城頭水照簷橋柳兩山香盡在  
蒲荷十里淨相兼愁將久雨春無賴別在明朝酒未厭

甚欲去同三四友鱸風更捲一江簾

鮑時益之尚館  
氏鱸風亭

春晚一首約同志汎舟

匆匆春事竟如何問訊庭前手種花又送行人又風雨  
半為芳草半泥沙橘香通國今無恙梅實於人晚更佳

莫放此春齊去盡夜深愁聽一池蛙

用前韻招蕃叟弟仍和蕃叟癸卯二絕

細看物理愁如海遙想朋從眼欲花  
逆水魚兒衝斷岸貪泥燕子墮危沙  
百年喬木參天上一昔平蕪著處佳

行樂不妨隨邂逅我無官守似蜆蛙

蛙通作龜

落花風雨柰愁何愁亦不應緣落花尚可流觴追曲水

底須占鵬似長沙

孟夏事

無人晤語鳥烏落為我食貧櫻

筍佳休說闕河無限恨腹非空怒道旁蛙



大饗須三飴中黃起四維欲追千古意眼底合深思  
功名還壯士道術付諸儒但欲謀田闕扁舟下五湖

送翁誠之尉慈溪

徐劉文采後鄒魯典刑間為母求三釜令人見一斑時  
平無事立地僻得官閑好索梅花笑題詩海上山

詩律吾將問心期孰與親明朝當異縣永夜更懷人尚  
友逢三益明農識大臣可無相問訊勿道鬢毛新

和陳仲石韻

久矣懷相與翩然喜見臨清風生案

闕

短日過墻陰王

事何時暇神州半陸沉諸公宣力去伴我水雲深

送謝懷英道士歸廬山懷英棄儒服從皇甫道

人游晚入東宮賜號觀復大師

場屋收餘策匡廬寄一瓢款門如有欲委幣輒難招菜

甲留終夕蒲團共小橋崆峒他日問應記說神霄

懷英自言

林靈素遭遇  
誤國事甚悉

一別忘年月重來失故初美髯今幾尺街袖竟何書

謝嘗

持所著老子寶錄并皇甫  
記求題跋余未暇及也

勛業諸公在衰遲半世餘許

身無補報吾亦欲樵漁

送陳持中赴四明節推二首

更無人未識東州晚得吾宗第一流  
編磬在縣金奏合  
清冰出壑玉壺秋喜纔一見還分袂懷欲多言但倚樓  
亦有鄮山三四友可令觀政話然不

前修恨不為同姓更有跼然喜似人  
歲晏得君顏面好  
天涯從此尺書頻政須有力同扶世業已將名自絆身

它日雲臺勛績上南陽應記舊比鄰

乙巳歲首寄彭子復徐子宜

又過一年空草草尋思萬事太勞勞  
歲煩士友愁薪米日見兒童嘆鬢毛  
亂卉各隨分寸長新禽已變兩三號  
及時君亦圖良集莫待春深水一篙

次韻奉酬丁少詹見過同遊仙巖遇雨而別

佳人何似似江梅邂逅梅陰共舉盃  
欲與溪山成勝話却因風雨得空回  
新詩報我春乘興小徑從今日掃埃

自是衰遲愁獨立敢論名字望朋來

瑞安宰劉伯協載酒遊趙園叔靜道甫子宜行之同集小雨喜霽

上已所餘春有幾不堪風雨付春愁君能載酒知誰侶  
我欲看花不自由倚岸小舟謀未定隔林斜日故相投  
莓苔踏遍篝燈去收拾殘紅挿滿頭

和丁少詹韻

盡日支頤聽雨聲閑中惟得自知明朋來何敢煩公等

老去方慚負此名待欲短檠看少作敢將尺牘論交情  
區區却望從容意要莫令人一座傾

明月隋珠忽墮前坐令衰颯意飄然無端太史頭搶地  
安得揚雄賦上天前輩門牆餘幾在他時竹帛竟誰傳  
落花流水君愁不南渡于今六十年

病餘久不趨郡且遷仙巖書院於屋西有懷同  
志

欲往如天際相期忽歲華山空明獨樹江晚暗連葭作

屋皆三益藏書可萬家豈無人裹鉢躬自灌園芽

酬陳願剛見和前韻

離合皆天意盈虛幾月華家纔辦藜莧吾亦逐蘆葭憂  
世還當路論兵有故家深深看踵息陰火養黃芽

寄謝景英叅議夢作寄詩覺來追記兩句菟夢  
半年皆草草鬢毛一別益蒼蒼足成之

故人不見吾何適欲見其人已異鄉菟夢半年皆草草  
鬢毛一別益蒼蒼籌邊淮海何遲暮乘障湖湘亦阻長

及此居閑宜問訊  
題書須待滿林霜

寄題翁誠之慈溪縣尉廳無我亭

星月明當戶  
烏鷺下傍人  
小亭長獨立  
通國自相親  
置尉緣求盜  
居官已喪真  
須知三尺外  
敲榜亦深仁

和郡守沈持要賞柑之什三首

滄海無波日萬艘  
山農困廩自相豪  
爭看紫橐行阡陌  
可對黃柑負酒醪  
曲水一觴隨意集  
成都千騎最頭遨  
風流儒雅誰公似  
增得東嘉地望高



東都門外問征艘去國身輕亦太豪誰可對床聽夜雨  
自於同社燕春醪不知溫詔從天下又罷幽尋與世遨  
從此宜休堂下夢顧瞻松栢為誰高

仰止蒼溪近一艘幾年猶未識人豪黃堂為客知何夕  
白髮從公飲此醪四海衣冠多後進兩朝几杖舊同遨  
令人仰視冥冥翮不道微風燕雀高

和沈守持要觀潮閣留題

平生欲賦觀潮閣立盡斜陽倦復還一日江山蒙筆力

百年名字滿人寰  
郡從晉宋風流後  
詩到蘇黃伯仲間  
向去摩挲看石刻  
誰知功在十年閒

公閒居十年

奉陪王德修登觀潮閣兼呈邑宰劉伯協

觀潮閣在東溟上有客來登自華陽不道雪山通老栢  
却看朝日上扶桑  
勝游氣合南三郡

荆揚並也  
劉江西人

妙畫家

傳晉二王後會不知誰與繼  
爾江吾海永相望

落成王朝奉廟以薄恙不獲預謝  
劉宰并諸鄉

大五首

盜起清溪兩澗空  
童王親自帥元戎  
誰知小邑無亭障  
但握空拳有隱功

橫塘一字比南金  
滿紙書勞屬意深  
太史不知收拾未

邦人父老淚漸襟

許忠簡公嘗手疏王公  
濟守禦事欲列諸朝

操一豚蹄亦可憐  
欲將廟食自旌賢  
壞牆頽壁神臺笠  
不見干戈六十年

却向平時念後艱  
棖題百尺忽如山  
誰將西上逢人問  
令尹何如此一班

抱病荒村望欲迷  
駿奔無數獨鷄棲  
瞻言鼙鼓何時歇  
好聽農郊雨一犁

和沈守持要題謝公樓額

危樓何在水雲中  
穿市牙旗退自公  
閑作此來橫笛夜  
愛看人醉落帆風  
歡呼夾道江聲合  
硬語蟠空客技窮  
姓字從今聯沈謝  
不知千古更誰同

沈守生日

燕寢凝香不記春  
宜休堂下栢輪囷  
三吳南渡今多士

四皓東宮此一人雅不欲書名上上謾令在處歲陳陳  
玉卮宴罷思黃髮應合從頭第從臣

觀南塘四首呈沈守

曾不容舳舻尺間誰知救溺合纓冠今從枕席人行過  
用趙充國語最好翻盆雨後看

夾道歡呼百里間不論扶杖與勝冠公年幾許顏何似  
遲放牙樯待我看

樂在宜休水竹間十年黃帕裹朝冠却乘五箇花文馬

來與江村婦子看

別乘潘郎伯仲間竭來公遼去彈冠更將未盡公碑意  
收入新詩為並看

止齋集卷五

欽定四庫全書卷

止齋集卷六

宋 陳傅良 撰

律詩

桂陽勸農

雨耨風耕病汝多誰將一一手摩娑幸因奉令來循壟  
恨不分勞去荷蓑涼德未知年熟不微官其奈月椿何  
殷勤父老曾無補待放腰鎌與醉歌

九日奉呈同僚四絕句



澤國重陽花較遲得花雖

闕二字

愁余家家人醉鷄豚社

獨對西風憶鱸魚

小雨廉纖僅滑泥強隨年少更攀躋欲憑最上浮圖望  
晚稻如今齊未齊

臨風遮莫晚山佳自古功名看鬢華幸自不知余種種  
可教容易落烏紗

領客山危亦既懽故人往往去歸班明年此會知誰肯

為上吳山望楚山

教授將赴闕發  
旬亦旦夕解官

柳守丁端叔以九日詩至次韻奉酬

十年不見尋常事九日相違咫尺間  
橙蟹渠能追勝賞  
藪牲孰與奉慈顏  
逝將酒坵更酬酢  
乍可詩筒略往還  
新將適聞臨遣罷  
鹿頭吾待望吳山

丁端叔和九日詩至用韻奉謝恤鄰之義且申  
前請

壯不如人老更遲可憐赤

闕二字

宗余鄉微膚使賢方伯

誰激西江活鮒魚

生怕端歸趁紫泥緣危方藉得同躋交鄰誼與春秋並  
應許臧孫數告齊

夏畦不病晚種佳哿矣將詩補黍華散百為千吾寫似  
深山窮谷徧籠紗

不因與國近交歡冰齒相從髮已班多見長才無肯綮  
豈辭一簣竟為山

再用前韻簡丁端叔

乞鄰亟只報何遲愁絕飢甿一勝余上有加飡下相憶

莫同汎汎寄雙魚

閉關饒着一丸泥我亦前扳更後躋四海弟兄看取  
苛風不斷鴈行齊

事到難時意轉佳聲名早已動皇華撥煩自古書生短  
只合橫經住絳紗

繇吳入楚共悲歡懷欲班荆竟未班直待還艫願銜尾  
洞庭彭蠡浪如山

和丁端叔竹梅二詩韻

端叔於庭前對  
梅柏竹八竿

空階瑋若下琅玕全楚何人巧耐寒誰伴八龍長傲雪  
蕭然一榻卧裘安

管領春風別有天不論水際與山巔祝融玉立湖湘凍  
獨付寒梢笑粲然

丁端叔送牡丹以詩來用韻酬之

覺省他年見一班老從湖海看春頌瞻言百里幾相及  
仰止高山竟莫攀每事乞公留上策不才容我著中間  
一時公論方當路愁為絲麻棄蒯管

客來談政已班班况復書滕一再頒亦欲頡頏相上下  
不容分寸得躋攀花猶河洛承平闕詩在黃陳輩行間  
簿領役人塵撲面沃如雲霧下茅菅

和丁端叔歲晚書懷韻

來涂藍縷雪埋人三百於今又六旬奏課定應書下下  
班春聊復喜津津餘蔬被壞農無恙茂草連扉盜自新  
曳杖鹿頭時極目炊煙齊起兩州民

丁端叔送海錯以詩來用韻酬之

澤魚山豕各忘年味可勝窮總所便堪笑荆吳相俎豆  
遂令蠻觸自矛鋌食無誤蟹車同軌貢不徵蚶澤漏泉  
我在窮山人迹罕亦蒙惟錯饋甘鮮

酬王判官和九日韻一以歸德於部使者二寄

郴州使君三以為謝四奉留也

皇華六轡按倭遲博採參差到接余

詩注荇菜接余也

我獨內

慚無具甚萬家亦免釜生魚

想懸榔桂一雲泥夫子聲名正日躋乞與蚤移河內粟

牙牌歸德報班齊

翩翩公子一何佳  
銜命窮山薄歲華  
獨自把將詩過日  
不知梅影下牕紗

懷自何年晚見懽  
匆匆惜已闕  
聲班青芻白飮吾何有  
風月猶堪倒玉山

戊申臘桂陽喜雪

月不能明雨却稀  
山容野色夜輝輝  
清霄下際雙瓊闕  
仙仗前驅萬玉妃  
亘古嶺旁冬不到  
從今湖外歲無饑



來年此日吾何適  
蓑笠寒江一釣磯

再用喜雪韻一以書懷一以喜客

南人見雪古來稀  
見只愁吟草木輝  
留嚙氈毛窮漢使  
說開圍角老胡妃  
我嘗豪健能無褐  
今已衰遲要不饑  
北望鴈門腸欲斷  
春蒲空老舊漁磯

瘴雨蠻煙此後稀  
山童亦與借餘輝  
爭看狂穉相呼喚  
下啄饑鳥自匹妃  
苦乏貂裘堪夜永  
喜無蠶子着冬饑  
興來那況山陰客  
為我扁舟倚石磯

題范秀才萬卷堂

雅尚時相背幽棲我數過  
兒應看客慣田孰與書多  
自析唐柳縣誰聯漢甲科  
儒門今有此天意定如何

和段君仲衡同令嗣天晴少出之作

文字時高下功名勢去來  
誰人堪語此吾道竟懷哉  
攜幼安容膝巡簷笑索梅  
巷門通後圃今數為君開

陳頤剛注孫子許拾遺贈詩用韻寄之

千帆過盡獨舟沈  
玩世黷黷踵息深  
何自著書今白髮

不禁戀闕此丹心詩來滄海珠盈把人在掖垣梧十尋  
應為一編三致意細論小雅到交侵

和段仲衡譙樓新軍額二首

潘帥德廊為書軍額以立春日揭之

筆落元戎重詩成坐客新譙門雙壯觀邊將一團春夢  
破盤行玉名存甕得銀

桂陽因銀置監今無復有

哀遲亡補報著意

與民親

寒消晴後雪光轉凍前風歲已宜麻麥人猶厭芥菰樓  
頭千里望筆勢萬夫雄及此吾何力天低露草豐

和蕭俊仲司法詠譙樓新軍額韻

海濱驅馬過湘濱喜及今春憶舊春公燕有時令市酤  
村舂不繼待炊新嚴城鼓角留三字當代衣冠第一人  
看取吾民繇此去萬家雞犬永無塵

送洪子端還鄉

子端丞相之孫

將相三陳後文章兩漢餘英標還有此天意定何如海  
內相離合年來半毀譽未知貪尚友孰與鄴侯書

送吳德夫

嶽麓樓頭卧湖湘眼底空聲名無處著容止與人同白  
髮何多日輕帆不待風脩門春漏淺封事倩誰通

楊伯子以其尊人誠齋南海集為贈以詩奉酬  
辱與門牆最不遲白頭方誦嶺南詩文從嘉祐今三變  
人在廬陵此一時細數儒先能幾見獨憐歲晚欲何之  
瀟湘直下長江去得望蓬萊却更疑

潭帥潘德廊生辰

落南添得黑髭歸歸與相忘草木知嶽麓沈沈秋杳靜

湘波穆穆夜帆遲  
人間公論今何在  
柱下家聲此不疑  
德廊乃子賤  
舍人之姪但欲公年如衛武  
為留淇澳變風詩

衡守劉子澄以詩來和韻奉酬

曳裾朝路不同時  
謀食衡湘亦把麾  
一見相忘光可鑑  
十年何在怒如飢  
力堪扶世將誰可  
語不驚人或自危  
夜雪埋山江欲凍  
依然春信在南枝

遊南嶽

天作之山曷為哉  
遙知閭闔正南開  
兩川文武長江下

百粵車書五嶺來  
柴望久為周墜典  
牢愁多見楚遺才  
不知崧岱還何似  
我欲將書寄鴈回

登祝融峯喜霽

仰止扶藜鬢髮蒼  
恰當風雨暗三湘  
為誰一闕天無際  
及我重來日未央  
江過數州多曲折  
山緣長畝半青黃  
老僧耐得從頭問  
問到吳門竟渺茫

和沈帥持要張漕季長韻二首

欲杭一葦近聲光  
恨不先期燕子涼  
舊學甘盤聊此日

倦游司馬尚他鄉別從滄海山橫斗

謂別沈於永嘉華蓋山下來自

岷峨水濫觴不謂偶成三楚客得為蘭杜附諸香

麾節元戎祖席光晚風吹雨借初涼師傳問訊誰書院  
石刻摩挲是道鄉聞有先聲來召駟想無後會到流觴  
路朝正設橫經席冊府重紬辟蠹香

### 送沈帥

甘盤夢不入高宗四皓莫知其所終傳野有人能論學  
漢庭無事可言功行藏於此嘗成趣談笑從今得退公



分付諸兒理民社宜休堂上聽休風

攜客過王提舉園訪梅劉連州以詩來因用其

韻

屋後雲梢萬箇長屋前風蔓一川芳有梅自索巡簷笑  
無酒還酤踏雪香偶與三劉同下榻却懷二宋對持觴  
是日同集劉連州景晉父子及宋伯華也坐  
客皆懷伯潛故云伯華伯潛宋景文公後  
吾何敢欸乃聽人汲曉湘

再用前韻簡劉連州

吳楚相望路阻長我來邂逅挹羣芳人如盤谷元非隱  
詩到孤山不道香每與盞簪移永日更須篝火及餘觴  
何須誇去東州說不學藍關獨弔湘

小詩為張漕壽一春苦雨張漕行部謁獄祠而  
霽是日登祝融

皇華散作九州春老穉

闕二字

夾道陳韓子莫愁今夕雨

甫侯元是此山神我雖載酒

闕二字

筭孰與將詩附不泯

他日中興編小雅若論孝友更誰人

謝司馬倅惠東坡竹石

出自坡翁餘百年傳之溫國子孫孫兩家文物來歸我  
便盍投簪去杜門

和趙帥俊臣壽張漕韻二首

但得桑麻徧楚間此心不在大夫環落花流水深春好  
畫戟清香永日閒英蕩偶來成勝賞萱庭孰與奉慈顏  
正應得句尤奇傑可繼淮南大小山

使者耕時出省春聯翩珠玉又前陳先聲所暨搖山嶽

落筆相豪泣鬼神嘉與九城俱晏粲訖無一事尚芬泯  
獨慚哀情歸何晚亦著中間作廩人

題耒陽黃宰詩卷

詩卷來何處棠陰日夕佳令人添白髮及此有黃花事  
業誰千載文章各一家何時定還闕解柁向長沙

送黃元吉

陸子靜  
門人

荷君來意固非輕曾未深交意便傾語到七篇無欠少  
學從三畫已分明每懷前此傷標置頗欲從今近老成

為謝荆門三益友何時尊酒話生平

懷歸丐祠

久矣懷歸曷月哉冠纓吾欲濯吾埃天寒病馬尚遠放  
日夕罷牛宜下來名家翰墨書還蠹蓋世功名骨已苔  
孰與東籬訪黃菊柴門終不為人開

送范東叔歸帥潼川

楚山黃落洞庭波背却鷄人問釣蓑歸思甚于三峽壯  
才名空自十年多曩游記得青燈在後會愁如白髮何

我更有懷言不盡故將短韻代長歌

送丁懷忠教授象州

二毛羈旅久一飮瘴鄉輕把酒時相屬令人意自平校  
官無簿領帥閫甚聲名

應仲實帥廣西

所恨冥冥雨梅天不肯

明

長沙騰月雷是日約宴趙帥俊臣聞雷乃罷越  
三日雨雪帥喜以詩相賀用韻酬之

民欲遮留上欲來

時長沙民數數投狀乞留趙帥而廟議欲召還

政聲無間

到輿臺道迎和氣收蠻瘴彈壓餘陰蟄楚雷已是因風  
成柳絮會須逐馬見銀盃一觴好上公堂壽不為梅花  
昨夜開

又和

沴氣反

平聲

為和氣來長沙千里一瑤臺新炊頻頻匙抄

玉熟睡家家壁撼雷天直於人如合券公應憐我欲傳  
盃向來韓子誇精禱雲合衡山特易開

趙帥復賦詩來用韻酬之

天水交光地欲無中間老子獨軒渠  
一蓑漁隱真堪畫萬玉龍驤不可屠  
已卜菑畬何幸甚却憐藍縷更愁如  
莫將此惠長私楚好上甘泉扈屬車

用韻詠雪簡湘中諸友

夾湘而住一塵無不在瑤池在石渠  
氣蓋松篁誰與競令行螟蟻自相屠  
山光際水天無間夜色通朝月不如  
中有一翁鬚皓白蕭然野鶴亦乘車

贈張孟阜絕句



燕坐何曾論古今  
束書高閣反求心  
若能領會無多子  
絕勝相從歲月深

用趙帥韻為孟阜解嘲

恨無毫髮老波瀾  
世有曹劉亦後班  
堪笑燕人夸璞腊  
欲隨圭壁上三壇

登祝融峯觀日出

星月凋零萬象昏  
誰能先我見朝暾  
東南已得乾坤正  
蠻貊方知夜旦分  
但覺滄溟浮佛屋  
却忘衡嶽近天閭

迢迢下憩山腰寺人世煙雲尚吐吞

舟中奉呈趙帥一首且述迎侍相與滿歲

曷不放言追鵬賦豈無幽思續離騷去年比屋餘三釜

周禮用  
脯字


昨夜沿江長一篙白髮豈曾緣吏役青衫那更

有兒曹魚軒肯為公來否相約春光訪蟹螯

除浙西憲舟過釣臺有感

一再登臨萬事非裏頭還已雪垂垂敢論筆力今無恨  
欲附碑陰始不疑臺閣有人堪共政江山如此且隨宜

論功漢鼎吾何有自是風流百代師



止齋集卷六

欽定四庫全書

集部

止齋集卷七至九

詳校官庶吉士臣龍廷槐

主事臣呂雲棟覆勘

覆校官主事臣李駿

校對官中書臣范鏊

謄錄監生臣黃嘉績

欽定四庫全書卷

止齋集卷七

宋 陳傅良 撰

律詩

上皇子嘉王生辰詩三章

兩宮頻燕喜交舉萬年觴會慶川方至重明日未央聖  
賢何繼世孫子更宜王聞說斯干夢祥占近一陽  
造次依儒術朝迴只一經更無他嗜好端是衆儀刑符  
應當良月聲華自妙齡帝垣從此日光燭紫前星

要識皇圖永當觀藝祖初維持今盡是回復更何如庸  
陋誰推轂哀遲此曳裾慙無為壽具獨袖一編書

方講藝祖

實錄故  
及之

袁起巖會飲湖上出示古刻酒罷各攜桂花以  
歸因成一絕

湖光不動見魚蝦敗紙殘編數十家巖桂叢中三四客  
醉歸人得一瓶花

又和

湖上簾須半捲蝦調水雪藕各名家有人不解長安飲  
話極茶鐺吸井花

寄陳同甫

古來材大難為用納納乾坤著幾人但把雞豚燕同社  
莫將鶯鶯惱比鄰世非文字將安托身與兒孫竟孰親  
一語解紛吾豈敢祇應行道亦酸辛

送辛卿幼安帥閩

長才自昔恨平時三入脩門兩鬢絲  
覓下可能長夜飲

花間却學晚唐詞潸然北顧關河永簡在西清日月遲  
雙鴈乘鳬滄海上與君從此恐差池

送盧郎中國華赴閩憲

相望千里馬牛風聯事湖湘各已翁造次便呼兒女見  
綢繆略與弟兄同百年又是梅花發萬事何如荔子紅  
欲附使輶嗟不及却憐身在俊蹕中

送范大著文叔知彭州

中書世祿今無幾唐鑑家聲世不多安得有人賢若此



忽聞去國意如何同朝最是頭先白  
知己還愁語太苛  
盡欲讀書三萬卷蓬萊未必似岷峨

和劉進之韻兼簡吳阜之

憧憧滿眼事何稠落落論心思  
獨幽去國未能身一葉  
懷人但覺日三秋池塘春草方同夢  
江漢歸舟更別愁  
安得簫韶儀兩鳳不妨燕雀自嘲啁

初夏有感因用前韻久旱適得雨欣然卒章

湖山嫵媚綠陰稠誰向芸芸得趣幽  
半破榴花方恨晚

新來燕子未知秋去為吏隱雖吾願歸得家山正自愁  
賴有雨聲寬百感忽如孤鳳見羣啁

送潘德久之官建康

平生不解通毛刺萬事無能改鬢華豈是襟懷堪逆旅  
直須詩句可名家老為賓客從戎幙強使妻孥理帽紗  
不有將軍寬禮數新愁却恐墮江花

同游張園酒中各嘆明年未知誰與此會余最  
衰病宜去因作詩識之

春過新煙能有幾愁生飛絮轉難禁可憐衰白隨年少  
愛看殘紅到夜深一輩衣冠方事事故園松竹已陰陰  
明年此會知誰共鴈蕩山前寄好音

次韻奉酬方輝先

也知朝士愧山林猿鶴相懷怨亦深屈指落花年荏苒  
斷魂凋鬢日侵尋向來相與期何事老去誰能會此心  
多謝故人重話舊獨憐志古定遺今

送倪正甫侍郎賀正

雪枿冰芽又復春中原闕觀屬車塵懽呼漢節從天下  
愕立邊兒夾道陳老去獨慚闕偃蹇君行決意問經綸  
顧瞻河洛關心處應記幽燕用事人

喜雨

天顧於人略有情片時收盡越山青老農望外扶犁立  
倦客愁邊擁被聽塵翳欲清閭闔道井花已上轆轤亭  
冥冥直待黃梅熟未要風池看約萍

送曾繼先赴山陰路鈐

鬚髯白盡猶強飮髀肉添多未跨鞍不向燕山親矢石  
却來橋塚護衣冠歸舟自此長相背薦墨于今尚未乾  
只恐燕然他日事獨無名字可同刊

送何起巖之江東

苦吟海內知音少獨往江東問政頻我亦他山於此別  
世無吾黨更誰親六朝故實皆新句一代風流尚幾人  
話次儻懷無恙否為將哀情再三陳

上元日同京仲遠趙德老羅春伯謝子肅訪郭

殿帥游鳳凰山次韻

層雲飛鳥共危欄  
江漢朝宗萬折盤  
王氣信知千古盛  
聖圖元自九朝寬  
公餘曳履探殊勝  
酒罷磨崖記衆懽  
哀情不知能健否  
相從河岱弄柔翰

癸丑冬車駕過宮留相還朝

一聲警蹕接天齊  
馳道無塵馬不嘶  
月御順行隨日轂  
乾端和氣匝坤倪  
三槐相繼歸公袞  
細柳還須聽將輦  
老矣尚能歌二聖  
不應專美在浯溪

和樓大防尚書送行韻

齊年兄弟又齊名商略行藏共此生自昔從君膽馬首  
如今輸我與鷗盟讀書松竹交千載曳履星辰聽五更  
借問塞翁誰得失請無一語到留行

折子明提刑自湘中以詩問訊用韻酬之

久立天涯詠式微胡然華髮尚

闕五字

望歸簪履

便冀君恩到蓋惟當世豈無君子論

闕五字

人詩

湘中一似桐鄉好安得扁舟着釣絲

泊釣臺灘下

今歲僅餘今夜月此舟三泊此江圻  
遭逢明主還遺恨  
慚愧先生獨見幾泗水列侯多不免  
湘山四皓竟安歸  
漢家故舊嘗枚數孰與東南一釣磯

臘月望泊舟釣臺灘下賦詩既而登婺女明遠  
樓誦之鄉丈陳德承同集黃奇卿張伯廣因書  
以遺德承之子性甫直甫後春六日奉和德承  
韻兼簡奇卿伯廣為別



行藏獨倚少陵樓。怨鶴愁猿孰與儔。嘗與萬人爭魏闕，  
何如一壑老菟裘。追隨士友從吾好，領略江山自此遊。  
急趁梅花理歸棹，雙溪為我亦西流。

贈杜伯高

臘後玄冥意氣驕。餘寒造物亦亡聊。風收夜雨春何淺，  
雲障朝曦雪不消。真悟此生纔半歲，恣聽何處是三朝。  
粲然一笑將迎我，賴有江梅慰寂寥。

除夜宿處州天寧寺

人言老去不如初我愛初心老轉無懶向門前題鬱壘  
喜從人後飲屠蘇杯盤甚簡眠須早禮數多寬拜要扶  
况復麴麴僧紙帳雞人不聽禁庭呼

寄僧嗣清

衡陽傑閣宵人記淮右豐碑刺史書永已橋山藏劍佩  
空餘雲漢照林廬河圖萬古陳東序汗簡諸儒校石渠  
誰道幽深窮衲子乞錢買石更崎嶇

余與嗣清作雲章閣記欲刻之衡山不果今清來

致舒州吳使君所書閣記石刻一本蓋投子山碑也於是壽皇晏駕一年矣讀之涕泗交下頃為學官逮事壽皇滿歲當罷去而對班尚在數月之後遂乞補外晚為祕書少監會聖政書成被旨詣重華殿進讀首篇壽皇色甚康顧視良久益恨平生之不遭也因作詩詒清以附碑陰

蔣處州仲可惠酒

括州太守闕亭侯及與前時一輩遊剩欲池塘看芳草

謾隨煙雨上危樓無錢可解催科拙有酒能寬放逐愁  
可笑杜陵嚴武客時時傍舍過牆頭

再寄用前韻

幸無骨相可封侯歸理先人舊釣游山下剩栽諸本竹  
水邊須著數間樓羣書可讀自隨喜一客不來誰與愁  
時把釣絲銷永日魚兒亦得兩三頭

丙辰壽國舉兄

是間南極老人星喬木脩篁亦有情直向朱明為後殿

不隨黃落入秋聲  
兒孫衮衮看新出  
兄弟團團得晚成  
笑閱世人心事短  
却從黃老問長生

送長溪高國楹從學朱元晦

洛學今無恙  
東南屬此翁  
從游雖已晚  
趣向竟誰同  
一第收良易  
遺經語未終  
歸期定何日  
我欲叩新功

以兩鶴壽薛象先

日與山農共一廛  
不應家有四乘軒  
殷勤分送平齋下  
為看蟠桃熟幾年

重陽日寄瑞安留宰留宰以是日宴新第人併  
見招不及赴

落帽沾衣總失真追隨萸菊亦勞神酒無肴核依然好  
家有溪山豈是貧沆瀣從空來夜氣青冥隨處際秋旻  
不知此是登高否為問慈恩塔上人

和林宗易菊花韻

一歲所餘秋有幾重陽偏與老相催每憐白髮能長健  
雖愛黃花亦懶栽好景游從須好友新詩風味似新醅

人生適意無過此  
恣聽東籬早晏開

和沈仲一北湖十詠

北湖只隔嶺頭雲  
誰在湖邊問訊人  
若得小舟通我過  
雨晴須破半時辰

右北湖

人去岷峨水自流  
豫章三字竟沈浮  
懷人好上層樓看  
木落山寒不肯秋

右豫章閣

可愛南山與北山  
北山上有斗芒寒  
碧雲歸盡人何在  
更捲珠簾到夜闌

右仰止亭

平平下語及雲管  
學到詩人豈不難  
莫似闕人大芳潔  
湘波千古訴椒蘭

右葯房

一年曾得幾番圓  
恨不驂鸞上廣寒  
占得波光須細翫  
恰聞滄海已狂瀾



右穆波亭

欲來花底竟差池  
我有佳名誰與歸  
翼日看花天一色  
孤裘猶自織寒機

右粹白堂

借無舟楫亦褰裳  
目斷蒹葭水一方  
今夜不來同剪韭  
隔山明日事茫茫

右遲客臺

萱草須鋤莫放深  
竹須剪伐待成林  
一花一葉皆相附

要使兒孫識此心

右萱竹堂

紛紛萬木盡西風  
獨立霜林我御冬  
澤畔無人誰著語  
止齋但護紫泥封

右楚頌亭

余雅愛頌橘之語  
仲一欲以名其亭  
一日出所藏潛邸  
頌橘二字遂改今

名

看花只為雨愁人  
一片纔飛減却春  
獨此得春無盡藏  
每於愁外見精神

右宜雨亭

周宣義三子仲敏明

闕

幼謹同年登第因以前

韻奉寄

營營浮俗賡還真孰與傳經妙入神一榜及看三子貴  
數椽能忍十年貧自將弧矢書閭史便使冰淵誦小旻  
家學如君今有幾殷勤羅拜我何人

再次韻簡新第諸人

行酒何如溫太真風流元不鄙錢神扁舟容我歸來老

一子令人買得貧雖有羣仙來月窟欲扶衰力上霜旻  
吾今已定漁樵約勛業煩公一輩人

送瑞安尉林叔全尊人還鄉

論交海內略飄零最晚相看却有情不以一經誇魯諺  
自於二子識徐卿橘香賸與蜂衙晚麥信急催鳩喚晴  
天氣正佳歸恰好莫將愁思為空名

送林叔全秩滿歸四明

三年絕境興誰同雞叫桑巔犬巷中但欲戶庭多暇日

不將鞭扑奏膚公相期霄漢搏風翮每見燈花綴玉蟲  
此去逢人臺閣上丁寧莫道止齋翁

送雪庵瑾禪師還山

五馬逢迎甚濶踈滿朝問訊近何如諸公極有遲留意  
一日連收竟別書佛法盛衰千劫後人生老壯百年餘  
向來游舊今亡恙願得斯人尚起予

周和叔通判雪寒索酒戲用來韻以將朋尊

持盃雖念故人寒欲予還不似印刳此債豈應行處有

麴春何日寄雲安

和叔入蜀故云

奉和周蕃伯用王道夫韻二章見寄

森森萬木一精廬黃卷青燈自卷舒却肯追隨三舍遠  
不論聞問十年疎遺賢公已長懷玉老圃吾方欲荷鋤  
安得謝巖題壁處一尊相伴看芙蕖

論定千年後心寬萬事平吾方慚鼠伎安敢道鴻冥門  
戶雖人境溪山亦世情半天喬木立盡日好禽鳴

壽叔祖母

與先人同生

三陽昨夜轉洪鈞，鳳歷今年又紀寅。  
再拜與君觴壽母，更生猶我面先人。  
兒孫夾侍渾忘數，梅柳前陳不記春。  
從此常為湯餅主，賸看諸婦抱麒麟。

東陽杜季高遠訪詩以送之

當世關哀壯，斯文看合離。  
強餐吾豈敢，後會子何期。  
村落秋彌好，溪山晚最宜。  
逢人相問訊，所欠更能詩。

春日和林宗易韻

白與紅兼盡，落梅小園獨。  
步日千迴浮，空曉色臨無際。

排闥春光撥不開  
學語新禽更後囀  
鋪茸細草雨邊來  
却憐追逐今無力  
放下簾鉤就麝煤

移花

櫻柳初無素與蠻  
可將何物伴身閒  
欲栽花木千餘本  
但候春風還未還

送花還宗易

酷愛看花懶種花  
知心惟有故人家  
花開分送花殘取  
娛老扶衰度歲華



遊鳴山寺徐一之兄弟載酒即席和其韻

情歸春力不勝驅風雨尚愁人  
摻裾掠盡殘紅前日樹  
催還新綠去年畬相將興盡隨花屨  
賴有朋來載酒車  
但得從今身尚健吾鄉風物勝匡廬

和徐叔子用林宗易韻見示

相過風雨獨何歟校酒論文已不如  
方信深交相戀嫻  
却因衰退更躊躇吟生池草書成束  
飲落簷花醉墮車  
明日待隨公等去我頭應始自今梳

和徐叔子勸農韻呈留宰

親從蓂莢問飢寒赴愬人人得犯顏更向棠陰聊憩茆  
要令粒食共鮮艱身歸雨露司存後詩在山川刻畫間  
飽飫之餘能細和止齋應有幾年閑

遊金輿趙園賦海棠梨花呈留宰

海棠故作十分紅梨更超然與雪同文物英華周盛事  
風流玄遠晉餘風

赴留宰寶壇之集因和蕃史弟趙園韻

一枝纔放前村雪一線初開愛日天  
潘縣風流凡五客趙園名字亦千年  
可無能賦如難弟恨不曾來有尉仙  
待得中興用循吏更於此地設離筵

示留宰

縣樓即日氣橫空施及觀潮亦奏功  
曾上石崗看蟻穴當圖一飽到山農

或以詩送來禽次韻奉酬

連年栽樹未成陰賴實堆盤慰我心  
手把新詩堪永日

休誇法帖送來禽

隔水佳人久不逢祇應我懶或君慵感時相饋情何厚  
却說雲泥笑殺儂

遊雲頂院和徐叔子韻

老大生憎兒女態更無春怨與秋悲略將盃酌隨宜具  
剩有溪山取次嬉愛客不妨兼汎汎論文何苦太奇奇  
況曾窺得尊生術通昔蒲團日一炊

壽薛象先

蕭然山澤一臞仙故被聲名絆俊躔祇為春秋同社燕  
遂歸風雨對牀眠中年曾未鬚眉白盡日全無車馬喧  
我有壽觴誰與共會昌湖上釣魚船

酬蕃臾弟韻

朋游同一輩伯季自相師薄宦俄哀暮清懽僅暇時我  
懷青冢曲子念紫荆詩但得無憂患幽棲豈不宜

壽潘省之

泛水淺紅荷十里蔽雲濃綠木千章旁無俗子同居巷

中有瞿仙一瓣香今夕還知是何夕吾鄉終勝似他鄉  
雙鳬便合青冥上笑看兒孫樂未央

丁巳壽國舉兄

歲自為詩歲自賡愁無新思思還生便從今閨書初伏  
待看何年值後庚漢網疎如天地濶奎文下與水雲平  
弟兄長健貧何病判解金龜當一醒

止齋集卷七

欽定四庫全書卷

止齋集卷八

宋 陳傅良 撰

律詩

村居二首

業已將身落耦耕時於觀物悟浮生  
擇栖未定鳥離立  
避礙已通魚並行  
野老窺窠占太歲  
牧兒敲角報殘更  
絕勝倚市看郵置  
客至還無菜甲羹

野衣農圃雜華髮  
弟兄同佚老  
便居僻貧閑  
喜命窮習

成杯酌少脫落語言工危坐看流景新萌又落紅

和宗易作屋之什

欲因舊築倍勞形昔在先生配二程梅樹護持供北顧  
萱堂潤色作東榮但堪樽俎來三益何必藩牆屏五兵  
若徒荼蘼分乞我亦令兒輩記家聲

送縉雲葉正初兼簡杜伯高

我固閱人非草草君於前輩亦拳拳經師未數郊夫子  
筆力方窺李謫仙所恨尚於收第晚將詩空與背時傳



頻年不信燈花報報得人來亦可憐

和宗易賦素馨茉莉白蓮韻

軒牕一日聚三英盡室無塵眼倍明閩粵固嘗矜絕美  
風騷猶未及知名羞將娉媚隨花譜愛伴孤高上月評  
獨恨遇寒成弱植色香殊不讓梅兄

沈仲一送菊自言封植之勞欲得詩為報為賦  
三絕

東籬何在菊年年菊視陶詩竟孰賢未必緣詩花更好

花將詩與萬人傳

霜螯風味小槽春新樣宮衣試麴塵

見周禮麴衣注

一段秋光

誰領此芙蓉凡子桂陳人

愁乾手自搭連筒苦雨丁丁杙小篷乞得花開急催客

明朝恐已著霜紅

仲一以詩來用韻奉答

陪侍經幃涉歲年亦嘗尚論鞠衣賢如今三嗅馨香泣  
惟恐將詩去浪傳

鳴咽苔移玉座春  
昔年曾扈屬車塵  
重陽不見黃封酒  
只見餐英獨醒人

剩有新詩入遞筒  
豈無能畫作掀篷  
金錢翠蓋相輝映  
著我皤然酒借紅

寄題薛象先新樓

矮簷風雨送蝸牛  
有客來誇百尺樓  
闔郡臺池皆下瞰  
背城湖海亦全收  
清時未放徒高卧  
半世何為故倦遊  
解盡橐金君計決  
月明長笛起漁舟

立春

千官勒馬謝幡勝萬國鞭牛占雨晴誰據槁梧相近午  
頗車徐轉鼻無聲

除夜用前韻

春來十日垂垂雨歲盡今朝亦未晴  
衰老見年殊不覺  
卧聽穿葉打窗聲

送子壻林申甫還侍

鐙鐙笙磬阼階東穆穆黃流玉瓚中  
近在門闌無此稱

老來襟抱更誰同  
幽燕遺恨須收第  
孔孟微言要忍窮  
精舍一區泉石好  
何時相就看冥鴻

遊趙園

主人避客竟何之  
雨過停橈落日遲  
賴有畦丁曾識客  
來禽花送兩三枝

赴林宗大招賞牡丹之集

剝啄要春酌園藥  
得晚晴千花名品下  
一葦病身輕文  
會非投轄清歡勝  
絕纓倦遊吾獨愧  
歸趁兩山明

寄謝懷英高士

聞君已得歸山請顧我方當絕跡時欲葺止齋猶未就  
篋中應有草堂資

和張端士初夏

綠陰四合水迷津春去雖愁却可人無數飛螢窺案帙  
有時乳燕落梁塵滿塘荷蔭將還舊試火包香又斬新  
短夜得眠常不足僧鐘遮莫報昏晨

屈原賈誼陶淵明文辭皆喜道孟夏而悲樂不同雖

所遭之時異要亦懷抱使然爾端士寄夏日一首若  
無聊然因和其韻頌初夏之美以解之

送周介之同年赴德化宰

民社須吾黨江湖足此情不堪秋暑近欲赴莫潮平拙  
宦成華髮憂時自短檠君看廬阜石千載尚垂名

謝林默之居士惠酒居士山居方與世絕尚欲  
友此廢人耶小詩舉發一笑

不將鶯鴨惱比鄰林下蕭然老幅巾乞與青州十從事

添成明月兩閒人

戊午壽國舉兄

一母分身四白頭從今家事付兒流只須老草供觴味  
乍可婆婆伴釣遊勞世萬人輸暇日好天一雨薦新秋  
平章何物宜為壽三十餘年晏子裘

止齋即事二首

性已耐岑寂老應忘隱憂齊年雙白髮盡日一蒼頭竹  
閑絨門鑰蒲團數漏籌未知庭廡下還有雀羅不



教子時開卷逢人強整襟再貧看晚節多病得初心地  
僻芟蓮好山低竹樹深寄聲同燕社明月又秋砧

戲題止齋叢石

雖無壁立翠琅玕聊當庭前犢鼻裍我亦聞之方伎者  
衆山皆大小為尊

重陽和朱直方韻

衰老登臨得並家絕勝十載向天涯直須與世為陶令  
謹勿令人識孟嘉藍水悲吟空雅健牛山醉墨漫歌斜

誰知竹葉雖無分一笑何妨菊自花

用徐叔子韻送其過毗陵

家食年年未解忙浮沈閭里但壺觴偶緣他故趨吳會  
可使吾徒憶魯狂曲水風流王逸少鑑湖窮約賀知章  
請於百尺樓頭上下視人間有肺腸

送四明汪文子

文盛經生少官輕舉子繁誰能堪遠役相與及微言殘  
凍留春雨新愁起夜樽斯文吾不敢短句送歸轅

寄九江宋居士

篋中每閱所藏書長憶瀟湘九死餘  
一別十年身尚健  
恨無飛羽過匡廬

酬劉進之

冰柱劉義句綈袍范叔寒所親  
多物望相識半人寰  
今老猶徒步吾窮亦厚顏  
幽懷真易足萬卷屋三間

己未上巳清明

霖霖故作落花天  
佳節重重倍悵然  
雖有庭除臨曲水

更無尊俎試新煙  
醑醑雅欲延春賞  
杜宇還能破晝眠  
賴得二昆同一客  
巖芽蒲笋短檠邊

和林宗易上巳韻

鼇鼇曙鼓五更初  
枚數何門可曳裾  
孰與課兒翻故紙  
幾曾緣客掃精廬  
常饑未免時中酒  
多病安能強著書  
自笑無才供視草  
徒勞身後問相如

和林宗易雨後韻兼簡沈仲一

溪山秋色日侵尋  
一水循除萬木陰  
幸有新炊送農扈

可無勝踐盍朋簪蒲荷綿亘衡從畝鷗鷺追隨下上音  
寄語北湖休獨自摩娑周鼎與商鬻

張端士以詩送蘭蕙因和其韻

暮春堂上抱天和時啓柴扉與客過客有可人須語似  
新篁來看玉森羅

寶壇寺和林宗易韻

夢回齒頰自天香何必招魂怨渡湘少待精廬天向曉  
有來嘉客歲為常雲山鎮壓魚蝦市煙雨莊嚴橘柚鄉

最好題名雙石闕可題周歷萬年長

答朱翔遠見別之作

總角相看五十年行藏殊轍各皤然豈無子美書成束  
欲送相如賦上天俗眼不寬多小謹交情何限復長篇  
乘壺偶自兵厨至聊助征帆一醉眠

嘗語客尊鱸橙蟹的對或言今年斗門堅寒故  
蟹不上又今秋風急鱸魚亦鮮余發一笑因成  
二十八字

萼蘆有玉西風急橙蟹無金東海深祇為酒醒愁夜永  
二蟲得失我何心

因客說秋秣水傷復用前韻

風鱸不須鹽豉好霜螯須著酒船深無由種秣求旁舍  
旁舍秋螟已蠹心

己未生朝謝莘叟兄送梅

無歲探梅不恨遲緝齋今送兩三枝也知造物多生意  
亦為畸人解笑願壬子恰同身墮地庚申還值國開基

數家誇道明年好好在長貧誦繫辭

又

莫笑栽培日月遲待看老幹及孫枝天將醵去春回首  
人與花同雪滿願萬里隴頭空故蹟孤山籬落但餘基  
至今佳句無人繼誰與招魂著楚辭

覓花

背山面水竹週遭雖乏樓臺氣已豪更得好花千百本  
中間容我誦莊騷



和徐魏叔見寄三絕

蒲團坐閒歲如梭  
不管門前雀可羅  
投贈紵衣纔薄物  
道人微笑已嫌多

紈袴何嘗不誤身  
梁園金谷草長春  
送將重錦齊三十  
笑殺生芻一束人

獨向心源識背趨  
豈於身外較精粗  
淒其下視人間世  
朝市區區地一夫

和朱宰遊丁園韻

榆火逢佳節棠陰接勝遊移樽忻及暇乘屐共尋幽日  
靜竹光合風喧花氣浮主情殊未倦哀暮為遲留

庚申上已

何事

闕三字

天低雨露慳一

闕

遺晚

闕

百感又春關墨

客山陰竹騷人洧外蘭誰知千古意不在

闕游間

清明後一日宴客明日宗易送牡丹有詩次韻

客去朝醒惡詩來晚思和名花如洛上佳句近陰何雨  
故妨新火春應墮夢柯莫將行樂地蝸角動干戈

和汪仲嘉樓大防二尚書賀鄭貴和華文休致  
韻貴和四明人從其子泰興為瑞安主簿

簪笏相摩入殿廬人皆自笑此區區豈無隻字踰華袞  
未必千鍾勝餽蔬吾見北山多後倦誰如東里竟先驅  
追隨曳履粉榆社猶及香山退傅無

歸然名節萬人尊詩落文昌帝九閤耄及衛公還失策  
早如疏傳亦傷恩華文延閣如今少神武脩門自古存  
我與東樓最欣慕掖垣燈火幾同論

寒食早起圍爐中戲和林宗易韻二首

疊帳重裘更怯風絕憐寒食到匆匆一春不見花開落  
但說栽花費幾工

春工偏以速為神誰管沈疴未覺春禁得春寒長恣賞  
甘心輸與少年人

晚移舟塘次值風而回草叟兄有詩次韻

經春屏跡與誰同苦雨衣篝亦自烘方此欲為官況事  
依然不值世情風蒙茸水國蒲荷蕩馥郁田家橘柚叢

最是一年行樂處翻成咄咄坐書空

送四明方伯起

世事關分合人情看短長君應愁富貴人已畏文章  
竚立親雙鬢追隨客累觴未知歸定否吾亦愛吾鄉

送楊渭夫入淮

老去關心最語離不堪離久會還希君方慷慨思矜振  
我已婆婆喜情歸萬事莫如身自愛十詩亦與世多違  
倘將書寄南來鴈且問瓊花果是非

從族叔覓老桂

他山有桂老鬚鬆，好植梅旁伴槁容。著我對吟前赤壁，

乞君分與左青龍。踰牆之樹宜無取，

國風將仲子兮無踰我牆無折我樹

桑

蓋屋於東本不凶，

家語有人問東蓋屋不祥孔子聞之

恭想短章蒙一

笑，便呼鉏耰破苔封。

蓮花

伯仲之間竹與梅，魏姚聲價浪崔嵬。雖然亦混魚蝦處，

風度自從邱壑來。

寄林宗大

春已無情雨妬花  
病還妬客到花家  
今當未雨纔身健  
杖策來看半吐葩

和莘叟兄詠張子房韻

不緣多病遽懷安  
閱盡人間萬事難  
謾以笑談分楚漢  
竟將功業付蕭韓

朱及之以所種荔枝結實招飲不及赴以詩謝之

閩譜余嘗第狀元年來雖見僅名存貢存天寶猶徒擾  
賦似相如亦妄論每羨朝陽私沃壤正愁秋雨妬芳樽  
絳衣玉質今何夕照我西歸十二軒

及之云以風雨  
僅存十二顆

從徐一之覓菊

我欲作亭題獨立苦無翠蓋著金錢園林百輩皆名勝  
為赴西風乞冗員

土盆瓦斛空中久羞見重陽插滿頭寄向柁樓煩送似  
毛鱸蟹蟹待新筍



次韻奉酬徐一之送菊

桂叢蘭畹悄無譁但有哀鴻天一涯節物更誰知白髮  
交情於此見黃花聲名獨立空秋際香色平鋪與露華  
南雅未收騷致意騷人應欲補詩葩

廷植姪得男朱文昭寄詩於湯餅集即席和韻  
喜說徐卿得二雛吾家波及亦君餘青衫手板宜從此  
斷簡家藏莫付渠但欲健如黃犢走不妨錯寫弄麋書  
更看湯餅頻頻供笑索梅花到歲除

送鄭主簿泰興解官歸四明

師友於今說鄭鄉，親庭分付舊行藏。但知職分宜棲棘，盡把聲名屬憩棠。一字未曾緣薦墨，扁舟纔可著詩囊。

問津漁浦多西笑，獨為萊衣味更長。

泰興以乃尊華文老不能車迂道處

婺自錢清漁浦歸四明

送孟延昌歸蘭溪

典同周命士，律協漢諸郎。師友今千載，妻孥各一方。髮從何處白，菊有去年黃。惜別無多語，開眸三斷章。

劉進之飲蕃叟弟筠亭且賦詩余與蕃叟族居  
蓋屏迹不出各數年於是有感次其韻

判與漁樵日往還  
鶴亡蜂遁徑苔斑  
何人不棄尋常事  
有弟相忘咫尺間  
寬網及余端已老  
祥琴相爾未應閒  
但將邱壑全分付  
可待移文始厚顏

林宗易劉進之見訪有詩再用前韻

牛羊日夕鳥知還  
休說年時玉笋班  
四皓亦嘗空老去  
二疏不在共功間  
脩書尚覺歸期晚  
隱几兼忘永日閒

況有宸章長對越  
昭回雲漢不違顏

題錢宰吸光亭圖

棲身雲夢八九上  
用意風雩五六間  
惟有澄波兼皓月  
尚憐波月蔽虧山

止齋集卷八

欽定四庫全書

止齋集卷九

宋 陳傅良 撰

挽詩

擬進御製孝宗皇帝挽詞五首

九廟威靈遠

遠一作重

三宗德業尊謳歌思藝祖歷數在神

孫欲返皇圖正先推帝繫恩諸儒議東嚮此意定初元

謂以隆興紀元

但謹雞鳴問何知鶴髮侵石經方典學盟載更關心四

海堯喪畢三年舜慕深匆匆付神器長樂尚沾襟

神機規禹迹廟算奪燕支大號初歸我成功少待時韃  
橐懷不滿簞食問何遲河洛空遺恨年年上玉卮

好學元無數忘疲晚有加明謨宗六藝妙用合三家照  
映天經緯流傳士齒牙奎文尊閣處更合榜重華

羣才何輻輳聖度似天寬清蹕留儒館黃金散將壇風  
雲一語合日月萬人看攀附今無路哀摧壯士肝

孝宗皇帝挽詞五首

藝祖開皇極何心畀後昆天將翊堯運世復見湯孫武  
接規模在仁追典則存煌煌宋宗社永永配乾坤

深衷何自見寬詔不勝書當寧延方岳逢人問里閭歲  
為周委積家被漢蠲除巷哭彌天遠長江淚不如

豈以崇高極能忘凜凜憂衣更三澣舊費為十金休熊  
館無秋獵期門絕夜遊恭惟懷顯德真可締孫謀

正觀真英主三王合庶幾此時生後聖端欲踵前徽濟  
世功何異除堯志偶違辛勤三十載十漸更無譏

不作脩齡夢天乎詎可謔白雲新厭世黃屋舊非心德  
業成千古閭閻寢八音烏號在何許霜重越山岑

挽吳明可給事

諸老俱淪落流風日轉移獨懷憂國意長說渡江時姓  
字誰如此功名早不疑却收湖海氣燕坐雪垂頤

憶上諸生謁公方薄恙侵欣然蒙絮帽恨不醉花陰自  
說看人熟相期晚歲深半天蒼嶺雪回首為沾襟

謁公夕

宿蒼嶺下天大雪  
明日嶺上深數尺



挽木奉議

蘊之磨  
事尊人

寵數頻年及俞音萬口傳豐碑來少海大軸落台躔教

子宜如此聞風亦凜然送車今塞道拱木看參天

東宮  
為馬

榮慶二字史丞  
相以詩賀之

盛事無虛得玄襟可自知徧觀同輩行誰似暮年時袞  
冕趨椒殿簫韶送玉卮又宜天一笑獨此有遺悲

悼蔣昇仲承事

扁舟來往適吾真却笑旁觀道隱淪三釜豈無兒可就

百年要與酒相親  
賸栽梅竹皆緣客  
晚得冠裳不語人  
試向南塘問漁牧  
定於此老亦沾巾

挽族叔父

松竹深園屋

闕

蓮賸種魚所愁  
賓客少不問稻梁  
餘盡

日

闕

相語盈門手自書  
吾兒有名字萬事  
聽何如

我懷終古恨不及  
奉觴時滿眼看諸  
弟何心賦此詩牛

羊來蟄蟄邱墓去  
累累亦有千鍾養  
曾無一字碑

蕃吏  
自為

尊人  
埋銘

題丁少詹姑墓誌後

白髮從夫志青芻為客謀送車今幾兩樂土有斯邱

歸葬

于父黨

猶子聲名盛他時雨露秋摩挲看石刻嗟惜到松

楸

挽樓朝奉

裘馬朋簪盛緋魚筦庫卑行藏公論在然否寸心知歲

晏曾三接民功僅一麾空餘華袞字有恨益棺時

史少傳銘

其墓

九寺方連姑專城又夾河晚看諸子好孰與一門多薄  
海皆驚嘆亨衢忽薦蹉大連同厚夜其奈少連何

挽包顯叟

樵牧常爭席篇觴早策功有懷隨事見不恥與人同我  
故竒諸子年來識此翁待看稽古力喬木已悲風

翁子看時輩平生不妄賢獨于公有誅惟恐世無傳他  
日須深刻吾詩可附聯草黃松柏禿名與石巋然

翁誠之作

狀行

挽張子由母

又是君王上玉卮  
未央雨露湛垂垂  
版輿此去還無恙  
芝檢重來更不疑  
四世團圞能有幾  
百年漸盡亦堪悲  
里中諸母今誰在  
聽說承平祐聖時

挽潘才叔母

剝啄唯深夜  
門前杙小船  
有兒能自致  
此母已堪傳  
竹

院前聞熟桓  
楹大字懸病懷  
嗟不及健筆  
附諸賢

才叔所居

院有竹

挽周宣義

魯山司  
法尊人

無酒澆陳草將詩刻隧碑遺名從此在真意竟誰知教  
子還餘事周人亦有時憶嘗從夜話欲去更遲遲

挽婺女何茂宏

勸駕嘗連夢應門忽二毛竟於時不偶吾更晚相遭宿  
草堪揮淚豐碑忍泚毫送車今幾兩誰最戀綈袍

挽薛季益尚書

徧試江淮聲籍籍久勞荆蜀鬢蒼蒼同時半已登槐棘

卒歲纔能足稻粱遺藁不為他日計佳城尚及此邱巖  
豈無後作多文勝令我懷人淚欲滂

州里誰如此達尊戶庭深靜最情敦不將尺牘通當路  
却枉扁舟訪杜門每見色溫如有屬欲書心愧不能言

從今若祭枌榆社好配橫塘兩獻樽

公與許忠簡  
公居同鄉

挽彭通直

子復監  
丞尊人

前輩如同郡流風僅幾人不令兒巧宦所尚世清貧及  
老猶書卷通班但幅巾吾銘雖未就鄉譽勝堅珉

挽沈次卿學正

洛學傳當代家聲屬此翁  
一生無世味萬事與人同  
恨不師前鄭欣賞客阿戎  
戎宜銘千古意豈在語言工

挽林承信

道夫教  
授尊人

重交寧問田安在急義固於官  
不知廩仕幸多花萼好  
幽棲宜與竹林期牀頭周易吾  
將老案上楞嚴晚得師  
此意自應天予後嶧陽未琢長  
孫枝

悼林仲逸縣尉



家故書千卷生纔試一班賞音殊不少筮仕獨何艱松  
菊將身隱蘋蘩忽涕潛幸哉賢玉潤有誅不容刪

挽張材卿

知郡大猷端明之子  
春卿尚書之弟

貂蟬不逮老端明世濟誰如好弟兄能著青衫偕計吏  
却將白髮去邊城夜魂俄斷凝香寢秋淚仍兼曳履聲  
萬石君家同一傳嗣書應更有公卿

挽新昌呂脩職

頃作庵廬客看公手種時溪毛無亂理宰木有連枝久

欲鑱他石今還賦此詩黯然懷宿昔絮酒定何時  
不道千山阻將遺百世名有兒能自致此老已堪銘  
豈無三釜賢誰似一經吾詞雖未就應有護幽局

挽尤延之尚書

自為師說竟誰宗每事持平屬此翁有志政須名節是  
斯文非獨語言工要令舉世人材出合在前朝行輩中  
安得長年留把柂後來各與一帆風

宿留江湖長子孫行歲節節耐人看及為侍從身垂老

欲試平生事轉難書就僅題前太史功成方記舊甘盤  
令人長恨經綸意歷事三朝見一斑

向來諸老獨歸然羸不勝衣萬事便燈下細書批勅字  
雪邊先著趁朝鞭豈應無故令身健却止功名與世傳  
遺奏定留封禪藁憑誰吹送九重天

壯歲從游兩鬢霜重來函丈各堪傷那知卒業今無及  
極悔論心昨未嘗相約歸期須次第獨存病骨更淒涼  
他年賴有門生記託在碑陰永不忘

挽沈虞卿侍郎

官重元非好思間樂有餘生  
兒早傳業課女夜抄書時  
事方關念歸懷不遂初經綸  
緣未了天意盍留渠

嗜古真成癖摩挲笑眼開  
斷編遺汲冢名篆出秦臺

闕二

字緣應盡雲山喚不回  
淒涼子雲宅問字有誰來

挽東陽郭德誼

簪紱何能貴聲名幸自脩  
凡今為我友幾半與君遊  
翰墨千年托松梧一夜秋  
令人懷昔日炯炯夢丹邱

悼楊休甫

袖手旁觀一世餘元非親物亦非疎  
酒邊每事如人意  
燈下通宵讀我書學到莊騷纔止此  
生逢周漢定何如  
西州相識無遺恨獨恨無從搆子祛

挽宋巖老參議

居然是是亦非非錯處稠中定不疑  
萬事過人旁袖手  
一生從衆自觀頤肯為壯縣雖嘗試  
畧見周行已逆知  
盡日杜門佳客至小槽親校酒醇醅

少小脩藏近市朝亦非著意混漁樵不為禦寇猶爭席  
好說淵明更折腰一飯重違凡子約千金終却故人招  
送車幾兩交相唁我獨難忘最久要

悼劉謙之知錄

海內多吾友飄零今幾人相忘尤墮淚欲誅輒傷神

余欲

作景元同父祭文皆不勝悲輒止謙之亦然

才力矜餘地心期恥後塵溘然

無一語愁殺白頭親

挽王興之提刑

四海王詹事傳家有象賢  
宦情塵滓外風誼典刑邊  
遺愛依前鄭羣居得少連  
生平纔樂此一夢涕潸然

悼濟陽夫人

久接江山境曾論子姓文  
於焉觀內則可以繼前聞  
榛栗嚴賓豆蘋蘩潔祀芬  
有人言不朽片石合摩雲

挽張春卿尚書

懷抱今遺直身名古象賢  
路車陳左塾笙磬在東懸  
再世星辰上三年雨露邊  
崎嶇空老去有識共潸然

論建回天力生平與衆同居常焚諫草人自避乘驄朝  
譽多張仲家聲近魯公挽辭吾不愧收入汗青中

悼翁仲立達州

憶昔看封事令人激懦衷邊籌皆破的硬語更盤空晚  
亦通家好居然與衆同行藏嘗論定誰假一帆風

淮幙何多譽巴城僅一麾最書膚使上好語近臣知筆

路江山

一作烟雲

久維舟日月遲空懷歸報牘不逮勞還時

挽劉端木司戶



十年共語昨來非長憶初年握手時身世自憐心炯炯  
功名猶恐論卑卑民彝亘古非蕪沒學者如公好器資  
緩轡徐行逢九軌可堪倏忽九原悲

挽林致賢提舉

一經韋氏學五桂竇儀家每恥鄉評過深懲履道華人  
方貴全辟事已墮空花寢衮來黃閣千年置齒牙

挽劉茂實和州

欲課民庸元道州欲評人品馬少游居無一事可切齒

薦有三公方掉頭送公歷陽令我愁目斷賓鴈書沈浮  
識與不識涕淚流人世安用須封侯

鄭自明哀詞

并序

鄉士大夫書說自明果然嗚呼悲夫自明為太學諸  
生數與余游乾道壬辰同試進士自明不第於是始  
別別三四年間自明以釋褐仕于朝而余之再至在  
所也則自明寔貴絕出其輩行間相過語至其歡狎  
悲壯與在學校時無異也余郡丞長樂會自明家居


待台州闕更數往來嘗造其所舍僧寺室中蕭然篋  
輿一乘老床幾數隻凡若干口日須婦翁米以為食  
而自明意象與在館閣時亦無異余每語人自明來  
日甚長也而今死矣自明言行焯焯在人耳目不但  
余能言之也余獨悲自明以喜事嫉邪取名于世而  
死最不幸好議論者曰是宜不良死也余觀自明立  
朝於進對苟得之間里廝役當諱而不以言上者具  
以情奏滿朝為危而自明雖即死不悔真若不愛其

死者然其事母孝左右不敢違晚得師友務為靖恭  
閒雅不苟坐立雖一飲茹亦必揣度無害乃下口余  
嘗美菌以進自明驚謂曰是可食耶往聞有食此死  
者至今不近也自明可謂重其死矣士患無志有志  
矣患不見知于上知而少不合輒不持重以究其用  
亦士之罪也方自明以母老請外去非上意天下皆  
以旦夕且復用自明又甚自愛而及于此何哉是不  
謂之天耶故余為斯文也他不暇論于其死亟致意

馬以見余悲且以解議者之惑亦自明之志歟自明  
長樂人姓鄭氏名鑑詞曰

母曰余兒兮吾莫知其何尤婦曰良人兮吾曷為懼此  
憂兄弟不以是咎兮良友稱其好脩恭不得其故兮庸  
強名之曰命相彼下堂而貽戚兮或結纓以順聽萬不  
同咸自取兮曾二者孰失其正聲鬼神之所仇兮人直  
躬焉是病胥屬鏤忽墮其前兮屈魚腹以為寗竒禍作  
於牖下兮顧奚悲而宜慶嗟子何傷兮獨余懷不能以

自勝尚或相爾藐孤今天終焉其有定



止齋集卷九